

第一冊 第五課 數字歌

〈數字真趣味〉

口白：禮拜透早，丸仔恰紅圓仔佇公園咧耍。

丸仔、紅圓仔：一放雞、二放鴨、三分開、四相疊……

口白：這個時陣，豆仔恰飯粒仔那開講那行過來。

豆仔：欸，恁咧創啥？

丸仔：阿兄，恁來矣喔！

紅圓仔：阮咧唱歌啊。

飯粒仔：唱啥物歌？

丸仔：就一放雞、二放鴨、三分開、四相疊……

飯粒仔：我知、我知，五搭胸、六拍手、七圍牆……

豆仔：八摸鼻、九摸耳、十拈起。

丸仔：阿兄，恁哪攏會曉！

飯粒仔：這是當然的啊！

紅圓仔：著矣！咱來耍別項好無？

豆仔：好啊，欲耍啥？

紅圓仔：嗯……耍接數字敢好？

飯粒仔：欲按怎耍？

紅圓仔：真簡單，一个數字後壁接一項物件，咱輪流講，比如我講一隻雞（指家己），你講兩隻鴨（指飯粒仔），數字愛一直接落去，物件袂使講全款的。

丸仔：好喔！敢若真好耍。

紅圓仔：而且，愛講這個公園內底的物件，一个人干焦會當想五秒，超過時間就輸矣。

豆仔：這簡單，我先來……（思考款）有啊！一粒丸仔！

丸仔：阿兄！（受氣大喝）

飯粒仔：換我、換我，兩欖樹仔。

紅圓仔：繼落換我，嗯……三隻鳥仔。

丸仔：四隻膨鼠。

豆仔：五蕊紅花。

飯粒仔：六、六、六……（緊張甲四界相）

豆仔、丸仔、紅圓仔：一、兩、三……

飯粒仔：害矣、害矣……

紅圓仔：足緊張的。

飯粒仔：（看向一位）啊！有矣！六尾蛇！

豆仔、丸仔、紅圓仔：啥！？蛇！（三个人驚狂大喝，馬上走開。）

豆仔：飯粒仔，你閣戇戇倚佇遐，猶毋緊走！

飯粒仔：恁是欲走去佗位？

丸仔：你毋是講有六尾蛇！

紅圓仔：著矣，足恐怖的。

飯粒仔：歹勢啦，我講毋著矣，是六隻杜蚓仔啦。（手比向花園內的六隻蚯蚓仔）

丸仔、紅圓仔：啥貨？是杜蚓仔。

豆仔：飯粒仔，你差傷濟矣啦！

飯粒仔：歹勢啦……

【講看覓】

第一、公園內底敢真正有蛇？

第二、請恁嘛來耍「接數字」，用教室內底的物件來耍。